

玉機微義卷之一

中風門

○中風叙論之始

內經曰。風之傷人也。或爲寒熱。或爲寒中。或爲熱中。或爲偏枯。風者。善行而數變。至其變化。乃爲他病。歷陳五臟與胃之傷。及風病名。皆多汗而惡風。

詳見本文

按風論發明風邪係外感之病。有內外臟腑虛實寒熱之不同。別無癱瘓痿弱。卒中不省。僵仆。喎斜。攣縮。眩運。語澹。不語之文。後世始與痿證混轂矣。要略云。風之爲病。當半身不遂。經絡空虛。賊邪不瀉。或左或右。邪氣反緩。正氣即急。正氣引邪。喎僻不遂。

邪在於絡肌膚不仁。在經即重不勝邪。入腑則不識人。入臟即難言口吐涎。

千金云岐伯中風大法有四。一曰偏枯。半身不遂。二曰風痹。於身無痛。四肢不收。三曰風懿。奄忽不知人。四曰風痺。諸痺類風狀。

按後世編集中風方治。皆祖要略巢氏千金之論。但不當以外中風邪立名。而與內臟痿證混同出治。此千古之弊也。

○中風脉法

要略云脉微而數。中風使然。又云頭痛脉滑者中風。風脉虛弱也。又寸口脉浮而緊。寸口脉緩而遲。皆曰

中風也

脉經云。浮而大者風。又浮而緩。皮膚不仁。風寒入肌肉。又滑而浮散者。癰瘕風。又診人被風不仁。痿躄其脉虛者生。堅急疾者死。

○中風不治證

髮直吐沫。搖頭上竄。直視口開。手撒眼合。遺尿不知。久或面赤如粧。或頭面青黑。汗綴如珠。聲如鼾睡。皆不可治。

○風分在臟在腑在經之異

病機要云。風本爲熱。熱勝則風動。宜以靜勝其躁。是養血也。治須少汗。亦宜少下。多汗則虛其衛。多下

則損其榮宜治。在經雖有汗下之戒。而有中臟中腑之分。中腑者。多著四肢。有表證而脈浮惡風寒拘急不仁。中臟者。多滯九竅。唇緩失音耳聾鼻塞目瞽大便結秘。中腑者宜汗之。中臟者宜下之。表裏已和宜治之。在經當以大藥養之。

發明云。中血脈則口眼喎斜。中腑則肢節廢。中臟則性命危。三治各不同。中血脈外有六經之形證。則從小續命加減。中腑內有便溺之阻隔。宜三化湯等通利之外。無六經之形證。內無便溺之阻隔。宜養血通氣。大秦芫湯羌活愈風湯主之。

按此分在表在裏在經之三證。立汗下調養之三

法可謂開後世之盲聾。但所用諸方學者宜詳審之。

○治風不可下論

發明云。治風當通因通用。惟宜宣發以散之。不可便以苦寒之藥妄下。龍麝硃砂牛黃諸鎮墜之藥。瀉之。按此言風本外邪。惟宜宣散。此風在表之時也。如傷寒中風。傳入於胃。亦未嘗不可下。論中便字妄字。可見其意。便者有早與急之義。妄者謂有不當下之義。

○治風不可利小便

如小便少。不可以藥利之。既以自汗則津液外亡。小

便自少。若利之。使榮衛枯竭。無以制火。煩熱愈甚。當俟熱退汗止。小便自行也。兼此證乃陽明經。大忌利小便。

○濕病似中風論

元戎云。酒濕之為病。亦能作痺證。口眼喎斜。半身不遂。渾似中風。舌強不正。當瀉濕毒。不可作風病治之。而汗也。衍義論甚當。易簡所言。與此相同。

按此則知口眼喎斜。半身不遂之病。豈止風之一端而已。况六氣皆能中人。其證亦有縱急搐搦。不知人等證。不可不以脉證分別。

○中風先調氣說

嚴用和云人之元氣強壯榮衛和平。腠理緻密。外邪
焉能爲害。或因七情飲食勞役。致真氣先虛。榮衛空
疎。邪氣乘虛而入。故致此疾。若內因七情而得者。法
當調氣。不當治風。外因六淫而得者。亦當先調氣。後
依所感六氣治之。此良法也。宜八味順氣散。

按此說真氣先虛。榮衛空疎。邪氣乘虛而入。擴前
人所未發。但旣曰虛矣。邪又入矣。補虛散邪。理所
當然。而止曰調者。意其謂因病而氣壅不通。調其
通暢條達。則真氣自復。邪氣自行之義。惜乎不能
詳也。况中風治法。豈止一端而已。

○氣中論

許學士云。世言氣中者。雖不見於方書。然暴怒傷陰。暴喜傷陽。憂愁不已。氣多厥逆。往往得此疾。便覺涎潮昏塞。牙關緊急。若便作中風用藥。多致殺人。惟宜蘇合香丸灌之。便醒。然後隨寒熱虛實而調之。無不愈者。經云。無故而瘖。脉不至。不治自己。謂氣暴逆也。氣復則已。審如是。雖不服藥。自可。

按氣中之說。即七情內火之動。氣厥逆由其本虛故也。用蘇合香丸通行經絡。其決烈之性。如摧枯拉朽。恐氣血虛者。非所宜也。後云不治自復之意。蓋警用藥之失實。勝誤于庸醫手也。

○四肢不舉有虛有實

病機云四肢不舉。俗曰癱瘓。經謂土太過則令人四肢不舉。此真膏粱之疾。非肝腎經虛。其治瀉。令氣弱。陽虛土平而愈。三化湯調胃承氣湯。選而用之。若脾虛亦令人四肢不舉。其治可補。十全散。加減四物湯。去邪留正。

按四肢不舉。世俗皆以爲中風病。此云脾土太過不及。皆能致之。其可一槩用藥乎。

○論風非外來乃本氣病

發明曰。經云陽之氣以天地之疾風名之。此中風者。非外來風邪。乃本氣自病也。凡人年逾四旬。氣衰之際。或因憂喜忿怒。傷其氣者。多有此疾。壯歲之時無

有也。若肥盛則間有之，亦是形盛氣衰而如此治法。當和臟腑通經絡，便是治風。然亦有賊風襲虛傷之者也。治法輕重有三。見前分在經在腑在臟之異。

按此云本氣自病，乃與劉河間論內熱所生相合。但彼云熱而此云虛，虛之與熱並行而不相悖也。

○風本於熱論

河間曰：風病多曰熱甚。俗云風者言未而忘其本也。所以中風有癱瘓者，非謂肝木之風實甚而卒中之也。亦非外中於風，良由將息失宜而心火暴甚，腎水虛衰不能制之，則陰虛陽實而熱氣怫鬱，心神昏冒，筋骨不用而卒倒無知也。多因喜怒悲憂恐五志過

極而卒中者。皆爲熱甚故也。若微則但僵仆。氣血流
通。筋脉不攣緩者。發過如故。或熱氣太甚。鬱滯不通。
陰氣暴絕。陽氣後竭而死。○痰涎者。由熱甚。則水化
制火而生。○偏枯者。由經絡一側得通。否者痺而癱
瘓也。○口噤筋急者。由風熱太甚。以勝水濕。又津液
滯于胸膈。以爲痰涎。則筋太燥。然燥金主于收斂。勁
切故也。○或筋反緩者。乃燥之甚。血液衰少也。諸筋
攣易愈。諸筋痿難復。以見燥之微甚也。

○治風用汗吐下三法

子和云。諸風掉眩。皆屬肝木。掉搖。眩運。目喎。筋急。手
搐。瘈瘲。皆厥陰肝木之用也。經云。風淫所勝。平以辛。

涼。世何以熱藥治風邪。予治驚風癇病。屢用汗吐下
三法。隨治愈。木鬱達之者。吐之。令其條達也。汗者。風
隨汗出也。下者。推陳致新也。失音悶亂。口眼喎斜。可
用三聖散吐之。如牙關緊急。鼻內灌之。吐出涎口自
開也。次用通聖散。涼膈散。天人參半芩丸。甘露飲。除
熱養液之寒藥。排而用之。

按此法的。係邪氣卒中。痰涎壅盛。實熱者。可用否。
則不敢輕易也。

○論中風不當與痿證同治

丹溪曰。今世所謂風病。大率與諸痿證混同論治。良
由局方多以治風之藥。通治痿也。古聖論凡痿各有

條自源流不同治法亦異夫風病外感善行數變其
病多實發表行滯有何不可局方治風之外又歷述
神魂恍惚起便須人手足不隨神志昏憤癰痰驕曳
手足筋衰眩暈倒仆半身不遂脚膝軟弱四肢無力
顫掉拘攣不語語澁諸痿等證悉皆治之不思諸痿
皆起於肺執傳入五臟散爲諸證其昏惑瘈瘲瞽悶
瞽昧暴病鬱冒蒙昧暴瘖瘈昧皆屬於火曰四肢不
舉舌本強足痿不收痰涎有聲皆屬於土悉是濕熱
之病當作諸痿論治若以外感風邪治之寧免虛虛
實實之禍乎若夫岐伯仲景孫思邈之言風大意似
指外之感劉河間之言風明指內傷熱證實與痿證

所言諸痿生於熱相合外感之邪有寒熱虛實而挾
寒者多內熱之傷皆是虛證無寒可散無熱當作實可
瀉

謹按中風之病古方冠諸方首以其爲人之大病
也夫風乃六淫中之一天之邪氣自外而入者也
古人用藥皆是發散表邪通行經絡之劑以其自
表而入亦當自表而出也至於東垣分在經在腑
在臟而有汗下調養之法可謂詳備精密則又通
表裏中三法而治矣若劉河間以爲熱甚制金不
能平木或濕土過甚反兼木化皆非外中於風乃
因內熱而生迥出前古之論我先師丹溪先生謂

數千年得經意者河間一人耳。由是觀之。若病從外邪而得元氣壯實者。當從古方發散之例。但用藥不宜小續命湯。須分所挾有寒熱溫涼之異。受邪有臟腑經絡之殊。若病因內熱而生者。當從劉河間之論。但有用藥不宜如子和專以吐汗下爲法。蓋病邪有虛有實。難以一槩論。又凡痿病實與內熱所生相同。醫者須宜識此。或問外邪之感與內熱之傷。何者爲多也。丹溪曰。西北氣寒。爲風所中。誠有之矣。東南氣溫。而地多濕。有風病者。非風也。皆濕生痰。痰生熱。熱生風也。經曰。亢則害。承迺制是也。治痿之法。詳見痿條。此不贅及。

○內目似中風論

續添

廬砥鏡曰經云神傷於思慮則肉脫意傷於憂愁則肢廢魂傷於悲哀則筋攣魄傷於喜樂則皮槁志傷於盛怒則腰脊難以俛仰也何侍郎有女適夫夫早世女患十指拳攣掌垂莫舉膚體瘡瘍粟然湯劑雜進飲食頓減幾於半載適與診之則非風也正乃憂愁悲哀所致爾病屬內因於是料內因藥仍以鹿角膠輩多用麝香熬膏貼痿垂處漸得掌能舉指能伸病漸近安

謹按經云風之傷人也爲病善行而數變變至他證之類故爲治不得其病情者往往或以風爲他